

## **Službene novine Federacije BiH, Broj 4/13**

Na osnovu člana 64. stav 2. tačka a) a u vezi sa članom 37. stav 1. Zakona o državnoj službi u Federaciji Bosne i Hercegovine ("Službene novine Federacije BiH", br. 29/03, 23/04, 39/04, 54/04, 67/05, 8/06 i 4/12), Agencija za državnu službu Federacije Bosne i Hercegovine donosi

### **PRAVILNIK O JEDINSTVENIM KRITERIJIMA I POSTUPKU IZBORA I PRIJEMA PRIPRAVNIKA SA VIŠOKOM STRUČNOM SPREMOM U ORGANE DRŽAVNE SLUŽBE FEDERACIJE BOSNE I HERCEGOVINE**

#### **I - OSNOVNE ODREDBE**

##### **Član 1.**

Ovim pravilnikom utvrđuju se jedinstveni kriteriji i postupak izbora i prijema pripravnika VII stepena stručne spreme ili visokog obrazovanja Bolonjskog sistema studiranja (u daljnjem tekstu: pripravnici) u organe državne službe Federacije Bosne i Hercegovine i druge organe i službe iz člana 74. Zakona o državnoj službi u Federaciji Bosne i Hercegovine.

##### **Član 2.**

Pod pripravnikom, u smislu ovog pravilnika, podrazumijeva se lice koje poslije stečene visoke stručne spreme nema radnog iskustva, već se prvi put zapošljava sa ciljem obavljanja pripravnčkog staža.

Lice koje nakon stečene visoke stručne spreme ima ostvaren radni staž u struci od jedne godine ili više, ne može se primati u radni odnos kao pripravnik.

#### **II - JAVNI KONKURS ZA PRIPRAVNIKE**

##### **Član 3.**

Javni konkurs za prijem pripravnika radi obavljanja pripravnčkog staža u organima državne službe raspisuje Agencija za državnu službu Federacije Bosne i Hercegovine (u daljnjem tekstu: Agencija) na osnovu zahtjeva rukovodioca organa državne službe.

Zahtjev iz stava 1. ovog člana sadrži vrstu visoke stručne spreme i broj pripravnika koji se prima.

##### **Član 4.**

Na osnovu zahtjeva iz člana 3. ovog pravilnika, Agencija raspisuje javni konkurs koji sadrži:

- a) naznaku da se radi o prijemu pripravnika,
- b) naziv i sjedište organa državne službe,

- c) opšte uslove utvrđene u članu 25. Zakona o državnoj službi u Federaciji Bosne i Hercegovine,
  - d) vrstu visoke stručne spreme,
  - e) naznaku da se izbor i prijem pripravnika vrši u skladu sa jedinstvenim kriterijima utvrđenih ovim pravilnikom,
  - f) napomenu da se radni odnos zasniva na jednu godinu ili duže, ako je to posebnim zakonom propisano,
  - g) spisak potrebnih dokumenata kojima se dokazuje ispunjavanje uslova konkursa,
  - h) rok za podnošenje prijave, mjesto i način dostavljanja.
- Rok za podnošenje prijave ne može biti kraći od 15 dana od dana objave konkursa.
- Javni konkurs se objavljuje u najmanje dva dnevna lista koji izlaze na cijeloj teritoriji Bosne i Hercegovine i na službenoj internet stranici Agencije.
- Rok za podnošenje prijave počinje teći narednog dana od dana objavljivanja javnog konkursa u dnevnom listu koji je posljednji objavio javni konkurs iz stava 1. ovog člana.

### **III - KRITERIJI ZA IZBOR PRIPRAVNIKA**

#### **Član 5.**

Za izbor pripravnika u organe državne službe utvrđuju se sljedeći kriteriji:

1. prosjek ocjena završenog studija,
2. trajanje nezaposlenosti nakon sticanja diplome visoke stručne spreme, prema evidenciji nadležne službe za zapošljavanje,
3. invalidnost.

Kandidati koji se prijave na javni konkurs za prijem pripravnika uz prijavu prilažu dokaze za kriterije iz stava 1. ovog člana. Dokazi mogu biti u originalu ili ovjerenj kopiji.

Ukoliko kandidat ne dostavi dokaz za neki od kriterija iz stava 1. ovog člana, neće biti bodovan po tom osnovu.

## Član 6.

Za prosjek ocjena završenog studija dodjeljuju se sljedeći bodovi:

### 1. Kod sistema ocjenjivanja od "pet" do "deset"

- za prosjek ocjena od 6,50 do 6,99	3 boda
- za prosjek ocjena od 7 do 7,49	5 bodova
- za prosjek ocjena od 7,50 do 7,99	7 bodova
- za prosjek ocjena od 8 do 8,49	9 bodova
- za prosjek ocjena od 8,50 do 8,99	11 bodova
- za prosjek ocjena od 9 do 9,49	13 bodova
- za prosjek ocjena od 9,50 do 9,99	15 bodova
- za prosjek ocjena 10	20 bodova

### 2. Kod sistema ocjenjivanja od "jedan" do "pet":

- za prosjek ocjena od 2,50 do 2,99	3 boda
- za prosjek ocjena od 3,00 do 3,49	6 bodova
- za prosjek ocjena od 3,50 do 3,99	9 bodova
- za prosjek ocjena od 4,00 do 4,49	12 bodova
- za prosjek ocjena od 4,50 do 4,99	15 bodova
- za prosjek ocjena 5	20 bodova

## Član 7.

Za trajanje nezaposlenosti nakon sticanja visoke stručne spreme dodjeljuje se sljedeći broj bodova:

- do 3 mjeseca	2 boda
- od 3 do 6 mjeseci	4 boda
- od 6 do 9 mjeseci	6 bodova
- od 9 mjeseci do jedne godine	8 bodova
- od jedne do 1,5 godine	12 bodova
- od 1,5 do 2 godine	16 bodova
- od 2 do 2,5 godine	18 bodova
- od 2,5 do 3 godine	22 boda
- preko 3 godine	26 bodova

### **Član 8.**

Ako kandidat ima invalidnost 60% i više dodjeljuje se 5 bodova.

## **V - POSTUPAK IZBORA PRIPRAVNIKA**

### **Član 9.**

Postupak izbora pripravnika provodi Agencija.

### **Član 10.**

Agencija razmatra pristigle prijave i utvrđuje redoslijed kandidata na osnovu ukupnog broja bodova dodijeljenih u skladu sa kriterijima iz čl. 6. do 8. ovog pravilnika.

Nepotpune i neblagovremene prijave, kao i prijave kandidata koji ne ispunjavaju uslove javnog konkursa, Agencija ne uzima u razmatranje.

### **Član 11.**

Agencija dostavlja listu kandidata iz člana 10. stav 1. ovog pravilnika rukovodiocu organa državne službe na čiji je zahtjev proveden javni konkurs. Lista kandidata se objavljuje na oglasnoj ploči Agencije i oglasnoj ploči organa državne službe.

Lista kandidata iz prethodnog stava ovog člana sadrži: naziv liste sa nazivom organa državne službe u kojem se vrši izbor pripravnika, mjesto, datum i vrijeme sačinjavanja liste, redni broj koji označava redoslijed kandidata na listi, broj bodova ostvaren po kriterijima iz čl. 6. do 8. ovog pravilnika i ukupan broj bodova, prebivalište i adresu kandidata, potpis ovlaštenog službenika Agencije i pečat Agencije.

### **Član. 12.**

Rukovodilac organa državne službe dužan je u roku pet dana od dana prijema liste kandidata zatražiti mišljenje Agencije o kandidatu kojeg je izabrao sa liste kandidata. Odluku o izboru pripravnika donosi rukovodilac organa državne službe u formi rješenja, uz prethodno pribavljeno mišljenje Agencije, u roku od pet dana od dana prijema mišljenja Agencije.

Ukoliko rukovodilac organa državne službe ne zatraži mišljenje u roku iz stava 1. ovog člana, Agencija će u daljem roku od tri dana dostaviti rukovoditelju organa državne službe mišljenje o prijemu kandidata koji je po redoslijedu utvrđenom u skladu sa članom 10. stav 1 ovog pravilnika ostvario najveći broj bodova.

Za pripravnika se prima kandidat sa najvećim brojem bodova.

Ukoliko se u organ državne službe primaju dva ili više pripravnika prijem se vrši po redoslijedu utvrđenom u skladu sa članom 10. stav 1. ovog pravilnika.

Ako dva ili više kandidata imaju isti broj bodova, prednost ima kandidat koji je ostvario više bodova po prvom ili slijedećem kriteriju iz člana 5. stav 1. ovog pravilnika.

Rukovodilac organa državne službe dužan je u roku pet dana od dana dobijanja mišljenja Agencije iz stava 3. ovog člana donijeti rješenje o prijemu kandidata koji je ostvario najveći broj bodova.

Izuzetno od odredbe stava 5. ovog člana, u slučaju kada se na listi nalazi više od jednog kandidata, rukovodilac organa državne službe, u cilju zadovoljavanja principa iz člana 2. Zakona o državnoj službi u Federaciji Bosne i Hercegovine, može izvršiti prijem kandidata, mimo redoslijeda utvrđenog u članu 10. stav 1. ovog pravilnika, pod uslovom da je taj kandidat ostvario najmanje jednu polovinu broja bodova koji je

ostvario kandidat sa najvećim brojem bodova, s tim da je dužan poštivati utvrđeni redoslijed kandidata iz istog konstitutivnog naroda, odnosno iz reda ostalih.

#### **Član 13.**

Rješenje o izboru i prijemu pripravnika iz člana 12. stav 2., odnosno stav 7. ovog pravilnika, rukovodilac organa državne službe obavezan je dostaviti kandidatu koji je izabran i Agenciji.

#### **Član 14.**

O izvršenom izboru i prijemu pripravnika, ostvarenom rezultatu i redoslijedu na listi kandidata Agencija pismeno obavještava sve kandidate koji su učestvovali u javnom konkursu.

Ukoliko rukovodilac organa državne službe u roku iz člana 12. stav 2., odnosno stav 7. ovog pravilnika ne donese rješenje o prijemu pripravnika, Agencija o tome pismeno obavještava sve kandidate koji se nalaze na listi.

#### **Član 15.**

Kandidati čije prijave nisu razmatrane zato što su neblagovremene i nepotpune ili zbog neispunjavanja uslova konkursa, odnosno koji smatraju da postupak izbora ili prijema pripravnika nije izvršen u skladu sa propisima, mogu u roku od 15 dana od dana prijema obavještenja iz člana 14. stav 1. ovog pravilnika izjaviti žalbu Odboru državne službe za žalbe Federacije Bosne i Hercegovine.

U slučaju da rukovodilac organa državne službe ne postupi u skladu sa odredbama člana 12. stav 2., odnosno stav 7. ovog pravilnika, kandidati koji se nalaze na listi imaju pravo izjaviti žalbu Odboru državne službe za žalbe Federacije Bosne i Hercegovine u roku od 15 dana od dana prijema obavještenja iz člana 14. stav 2. ovog pravilnika.

## **VI - PRELAZNE I ZAVRŠNE ODREDBE**

#### **Član 16.**

Prijemi pripravnika za obavljanje pripravničkog staža u organima državne službe koji su započeti prije stupanja na snagu ovog pravilnika okončat će se u skladu sa propisima koji su bili na snazi do dana stupanja na snagu ovog pravilnika..

#### **Član 17.**

Danom stupanja na snagu ovog pravilnika prestaje da važi Pravilnik o jedinstvenim kriterijima i postupku izbora i prijema pripravnika VII stepena stručne spreme u organe državne službe u Federaciji Bosne i Hercegovine ("Službene novine Federacije BiH", br. 35/06, 59/08 i 25/10).

#### **Član 18.**

Ovaj pravilnik stupa na snagu narednog dana od dana objave u "Službenim novinama Federacije BiH".

Broj 01-02-5-604/12  
25. decembra/prosinca  
2012. godine

Direktor  
**Sead Maslo**, s. r.